

宋學士文集

九

蘇子瞻
船

PDG

宋學士文集卷第三十六

翰苑別集卷第六

呂府君墓誌銘

府君姓呂氏諱文福字壽卿其先光州人宋季光爲極邊戎馬蹂踐無寧歲遂避去金剛臺上尋遷黃之黃岡爲黃岡人曾大父某大父某父某妣某氏府君幼喪父鞠於大母谷氏大母性嚴厲夙夜飭導必期底於有成府君年十四從事法家之學稍長唐律義疏皆精原其意比類相從支分脉貫必允契乎人情遂以抑剛茹柔洗冤澤物爲己任時承平日久未易得祿食乃俯首試吏巡檢之司會部使者申公簡夫持節淮西聞府君名召與計事衆咸愕曰壽卿之名何以達上官之聽乎府君笑不答黃州守脫因不花及萬夫長脫脫皆怙勢受賕貪墨之聲載道府君白曰不去此稂莠禾稼安得而茂乎申公然之皆捕寘于獄正之以罪申公名震淮西者府君之力也陞麻城縣吏邑民被強盜所掠訴之久未克獲

元律獲強盜至五者補一官里豪陳真傲其利縛駱和尚等
賂麻城尉煅煉成獄文上縣縣懼尉與守有連不敢問府君
知其寃竟平反之縣令長搖手相戒曰毋生事腕可斷此牘
也不敢署也府君從容抱案歷階而升請曰明公即宜署人
命至重豈玩戲具耶令長相顧遲回不決府君曰不署則已
當申郡司獄直達憲府矣於是不得已從之活者五人已而
厭煩囂杜門不出忽野峻台出綰郡章野峻台名臣趙魯公
子也尤愛敬之力碑爲其府吏伶優趙良鄉以利誘民家女
子教之歌舞用媒銜上官執權行賄無所不至府君又曰不
去禍本其能清政源乎白府公悉傳於法從良者數十人董
曩歌以爭田誤傷人至死議者欲當之重辟董辭輒不伏訪
于慮囚使者使者漫不經意疑不決者幾十載府君知其寃
竟爲白之俄遷蘄州未幾即辭歸謝絕人事築存初堂園中
延明師僞教子爲舉子業一飲一食必與師俱時大母猶在

程勸允薦嘗刻日畧於碑戒家奴授食惟恐後師亦感其禮
遇有知無不告之四方誦士大夫以術業遊者久館之弗厭
頻行必有贈遺人稱爲黃之名塾云至正壬辰黃陷于盜府
君携家走南昌尋爲僞漢所據僞漢之謀士多府君之弟子
欲邀致之府君戟手嫚罵衆知其不可而止入我

國朝其子熙出仕爲縣浙水西府君防閑訓迪允薦蚤出則
使齋鐫其戶莫歸必歷叩其所行事且曰某事當如斯不當
如斯諄諄千百言弗止熙受教爲清白吏府君事母孝遇人
也以惠嫻友不能婚嫁者助之死無瘞者爲給槨櫨雖屢求
弗厭性剛直或有過責必面折不少恕然遠近皆惟爲吏師
從學者森森立左右獄辭鉤連有不可決君片言之間如庖
丁刺牛皆迎刃而解與之遊者皆敬而憚焉不幸以洪武庚
戌三月二日卒於鎮江丹徒縣寓舍壽七十二以是年五月
九日塋縣東大慈鄉馬鞍山之原禮也元配葉氏先十三年

卒繼配姚氏子男一人即熙嘉義大夫吏部尚書孫男三人
謙讓安山女一人李希顏其婿也予聞之魏文侯時有李悝
者撰次諸國之法爲法經六篇漢蕭何增之爲九自時厥後
世益代增直至三百有餘爲之章句者十有餘家家數十萬
言凡斷罪所當由用者合二萬六千二百七十二條七百七
十三萬二千二百餘言嗚呼律豈易言哉自非府君才識之
明斷決之審孰能中其肯綮者哉是宜銘銘曰
法乃司命懸於重輕脫不獲於簡孚將枉物而傷生故慘覈
者類貽於陰飢而哀矜者必兆於尊榮嗚呼如府君者其殆
善用而得其平者歟

漢天師世家叙

嗣漢四十二代天師張真人以世家一卷命上清道士傳同
虛微瀛序其首簡瀛聞古者名世諸臣史官必爲序其世系
表以傳所以敦本始昭功伐也况於神明之胃理有不可得

而闕者今所輯世家但始於留文成侯而其上則無聞焉瀛
因據氏族羣書補之復用史法畧載其相承之緒使一閱輒
知大都而其詳別見於左方云序曰

張出自姬姓軒轅子青陽氏第五子揮爲弓正始造弓矢張
羅以取禽獸主祀弧星世掌其職賜姓張氏周宣王時有鄉
士張仲其後裔事晉爲大夫張侯生老老生君巫君巫生趯
趯生貉其孫曰抑朔至三卿分晉張氏事韓韓相開地相韓
昭侯宣惠王襄哀王開地生平相釐王悼惠王平生良字子
房漢太傳留文成侯居沛之豐邑生二子侍中辟彊及不疑
不疑嗣侯生二子典高典生默默生大司馬金生陽陵公
乘千秋千秋字萬年生嵩嵩生五子壯讚彭睦述其後多以
功烈著傳至於唐列爲安定范陽太原南陽燉煌脩武上谷
沛國梁國滎陽平原京兆等四十三望族中出宰相凡十七
人高生通通生無妄無妄生里仁里仁生覺覺生起起生桐

柏真人大順大順生漢天師道陵是爲玄教之宗其傳緒悠
長倍前望族之盛論者弗察見留侯再世國除即意其絕嗣
殊不知流裔南北如斯之繁也道陵字輔漢建武十年生於
吳之天目山登長博習群書後學者千餘人尋中直言極諫
科拜巴郡江州令棄官隱洛陽北邙山脩煉形之術章帝以
博士徵不赴和帝即位召爲太傅封箕侯亦不就乃杖策遊
淮入鄱陽上龍虎山合九天神丹訪西仙源獲制命五嶽攝
召萬靈及神虎秘文於壁魯洞俄往嵩山石室得黃帝九鼎
丹書及道既成聞巴蜀沴氣爲人留銳意入蜀初居陽平山
遷鶴鳴山感玄元老君屢授以經籙之法於是分形示化復
立二十四治增以四治以應二十八宿妖厲爲之衰熄如發
醢泉破鬼城之事甚多不能備載永壽二年復遷渠亭山出
三五斬邪雌雄劍二陽平治都功印一授嗣天師衡使世世
相傳乃乘雲上升壽蓋一百二十又三云衡字靈真有長材

詔徵黃門侍郎辟隱居陽平山誓以忠孝導民君子謂其有
繼宗開緒納俗安善之功衡生京師魯字公祺益續前人之
烈以鬼道教人自誦師君其來學道者初皆名鬼卒受本道
已信虎祭酒各領部衆多者爲治頭大祭酒皆教以誠信不
欺詐有病者自首其過復設義倉置義米肉其中任人量腹
取飽過取則有禍人歸者日益衆遂雄據漢中詔授鎮民中
郎將領漢寧太守其後歸魏太祖拜鎮南將軍封閭中侯五
子皆爲烈侯女歸太祖子彭祖魯死謚原侯生盛字元宗魏
大祖封都亭侯弗受始自漢中還龍虎山創三元日升壇授
籙盛生昭成字道融端坐石室虎豹逢之皆伏暨化去或見
騎鶴遊空中啓冢驗之唯冠履留耳昭成生椒晉安帝召之
不至椒生回回生迥迥生苻苻生祥祥字麟伯隨洛陽尉能
吐丹寘掌中光芒穿屋復吞之祥生通玄歲大疫以標植水
中汲飲者咸愈通玄生恒唐高宗問治國恒對曰能無爲則

天下治矣上嘉之恒生光先生慈正慈正生士龍士龍忘王
印長安酒家一少年盡力舉之不動明日士龍笑而携去士
龍生應韶應韶生順順生士元字仲良濟而多髯居應天山
四十年山多虎人莫敢謁焉每大風雨遙見乘黑龍往來諸
峰間士元生脩脩生謹謹生秉一字溫甫目光如電夜能視
物嘗負劔行山澤間叱一老樹雷即震裂之擊死二巨蟒及
小蛇餘百秉一生善善生季文五代之季受其錄文者頗衆
乃鑄鐵環券數萬繼之季文生正隨宋大中祥符八年召至
闕賜諱曰真靜先生後凡稱先生者皆賜諱也吏部尚書王
欽若爲奏立授錄院正隨生澄素先生乾曜乾曜生虛白先
生嗣宗嗣宗生象中字拱辰生三月能行五月能言七歲朝
京師錫以紫衣象中生葆光先生敦復無子從子葆真先生
景端嗣景端亦無子從弟虛靖先生繼先嗣繼先字嘉聞五
歲不解言聞鷄鳴忽失笑賦詩人異之崇寧初解池鹽水溢

遣使者召見書鐵符授之怒霆礫蛟死於水裔一日隨上入
寢殿宮嬪競以扇求書繼光以經語書之皆密契其意中舉
一握稽手書曰保鎮國祚與天長存乃上所御者也上奇之
命禱雨三日乃止授大庾大夫不拜詔江東漕臣郎山中度
地還建上清觀改爲上清正一宮從其學道者恒數十百人
靖康初上復召時金人犯汴行至泗州天慶觀索筆寫詩隱
几而化葬于龜山之麓後十六年西河薩守堅遊青城山相
遇於峽口繼先以書一封赤舄一隻今達嗣天師家嗣天師
大驚使人啓龜山之寔唯一舄存繼先無嗣以象中之孫時
脩嗣時脩曰繼先後子也吾烏得後之衆曰法統所在孰得
而奸乃從時脩生正應先生守真守真在母胎歷十九月始
產毗陵有妖憑樹詔劾之一夜風雷拔去後定濤江衝決高
宗賜以象簡寶劔清靜陰符二經守真生景淵景淵生慶仙
張公洞有井甚深慶仙戲折木葉擲之俄波濤騰湧有一老

翁從中出慶仙呵戒之而去慶仙無子後子觀妙先生可大
 嗣可太守真之曾孫其祖伯瑀父天麟皆常攝教事鄱陽水
 漲壞民廬無數袁提刑甫請可大治之殛死大白蛇水遂平
 尋又遇旱蝗可大禱之雨作而蝗殫勅受提舉三山符籙兼
 御前諸宮觀教門公事主領龍翔宮時當宋季元世祖聞其
 神異密遣間使訊之可大授以靈詮且謂使者曰善事爾主
 後二十年當混一天下逮至元十三年果驗可大生宗演字
 世傳世祖平宋憶其父言有徵應遣兵部郎中王世英刑部
 郎中蕭郁賁詔召之賜王冠王圭冠以靈應冲和真人之號
 仍給三品銀印令主江南道教事得自出牒度人爲道士宗
 演生與棣字國華世祖時宣授體玄弘道廣教真人賞賚優
 渥竟卒于京師與棣子弟與材嗣與材字國梁元貞初入
 見大明殿制授大素凝神廣道大真人大德二年海鹽鹽官
 兩州潮水大作沙岸百里蝕齧殆盡延及州城下與材授鉄

符於水符踊躍出者三雷電晦冥殲怪物魚首龜身其長丈
餘隄復故常五年冬無雪上曰冬無雪民間得毋有灾害乎
與材爲建壇禱之是夜雪下盈尺上大喜命近臣賜酒曰卿
能感神明一至此耶八年錄平潮功加授正一教主兼主領
三山符籙給以銀印視二品九年崇明州海隄崩俾弟子持
符往効之民夢有神填海者遂安至大初加賜寶冠金服制
授金紫光祿大夫封留國公給以銀印視一品與材生太玄
子嗣成嗣成卒弟嗣德嗣德卒其子正言嗣正言卒太玄
之子正常嗣正常字仲紀即今天師國朝六觀京師洪武
初制授正一護國闡祖通誠崇道弘德大真人領道教事給
以銀印視二品上復賜以褒文稱其腫樞電轉法貌昂然
人以爲策蓋歷代相傳以眼圓而鉅者爲玄應故
上因及之云瀛聞文成侯年少時學禮淮陽東謁蒼海君蒼
海君先儒學士以爲海神是也後又見異人黃石公下邳圯

上則其未達之際固已能交通於神明至其晚年名遂功成
乃欲辟穀從赤松子游實其初志非曰托之以自逃也故其
九傳至漢天師感慕興起學輕舉延年之術拔除陰慝一以
善道化民而嗣師系師繼之脩其業而弗墜唯恐有人橫遭
天閼者當漢之季天下雲擾唯巴漢之間民生晏然行者不
裹糧居者不捍關官府賴以成治如此者垂二十年其功之
及物可謂侈矣宜其世有令人出俾至化矣翹古諸侯之國
天之報施不亦彰明者哉或者專歸於名山神氣之結故能
演迤盛大如斯其論亦淺矣嗚呼文成侯子孫南北在在有
之其以功烈顯著者小則克法從大則至宰輔非不光明俊
偉也曾未幾何降爲卑隸者有不免焉其視玄裔相仍歷千
二百有餘歲而未已者爲何如蓋必有其道矣嗣是而興者
尚知勗哉尚知勗哉

跋樗散生傳後

樗似椿人呼爲山椿或呼爲虎目桐以其葉脫處有痕如之
故名材極易大而不中器用故又以散材稱之同郡許君存
禮有長材而不輕於世用托樗散生自斃雖其執德之謙要
亦有激云爾然而白玉在璞而中夜吐光若虹雖欲自閔終
不可得存禮今用薦者教授于燕將自此而升爲徂徠之松
新甫之柏建明堂措清廟爲棟爲梁無所不宜樗散云乎哉

題永新縣令烏繼善文集後

世之學者必有師雖百工伎藝之微亦必有以相授然後能
造其間粵况爲文者發造化之秘貫今古之統苟無以管攝
而闡闢之則何以盡其變化不測之妙其不傳之於師奚可
哉吾鄉修道先生胡公以光明正大之學發於精深嚴簡之
文訓迪學子篇章句字皆有法往往從之者多得文之旨趣
其所造固有淺深高下之殊而體裁終不失於古四明夢堂

噩師雖居浮屠中能久與先生游先生爲文之法實與聞之
鳥君繼善自幼學文於夢堂凡先生所指授者悉以語鳥君
故鳥君之爲文峻潔如明月珠起伏如春江濤因語二三
子曰必如鳥君然後可以言文也若無師授其可易致是哉
予常譬之有美錦焉使朝市縫人製之則能中度而適體委
於巖穴之粗工則左低而右昂上侈而下斂錦固錦矣其如
不合何文之無師授者亦若斯而已予老且多病文字一切
謝去不作縱有一二多仰手於人獨喜鳥君之文親題後而
歸之嗚呼予生也雖居先生之鄉而不能傳先生之學其於
鳥君又豈能無慊於中哉鳥君名斯道繼善字也明之慈溪
人嘗知化之石龍縣令調吉之新水其爲人溫然如玉蓋與
相稱云

瑯琊山游記

洪武八年十有一月壬子

皇上以皇太子暨諸王父處宮掖無以發舒精神命西幸中都公道校獵以講武事濂實奉詔扈從十有二月戊午次滁州驛濂進啓曰臣聞瑯琊山在州西南十里晉元帝潛龍之地帝常封瑯琊王山因以名頗聞秀嚴偉拔爲淮東奇觀願一遊焉而未能也敢請皇太子驩然可之即約四長史同行秦王府則林伯恭晉王府則朱伯賢楚王府則朱伯清靖江王府則趙伯友遂自驛西南出過平臯約三里所望豐山盤亘雄偉出瑯琊諸峰上唐梁載言十道志又云豐亭山山上有漢高皇祠又有飲馬池世俗妄傳高祖曾飲馬于此國朝以山麓爲畜牧之場別鑿池飲馬仍揭以舊名居人指云山下有幽谷地形低窪四面皆山其中有紫微泉宋歐陽公脩所發泉上十餘步即豐樂亭直豐樂之東數百步至山椒即醒心亭由亭曲轉而西入天寧寺今皆廢唯涼烟白草而已濂聞其語爲悵然者久之山東南有柏子潭潭在深谷

底延袤畝餘色正深黑即歐陽公賽龍處上有五龍君祠
皇上初龍飛屯兵于滁會旱嘆親挾雕弓注矢於潭者三約
三日雨如期果大雨及御寶曆爲作欄楯護潭且新其廟廟
側有時若亭濂坐亭上問潭側雙燕洞及其南白鷁洞以肆窮
覽人無知者乃止復西行約三里所有泉瀉出於兩山之間
分流而下曰釀泉潺湲清澈可鑒毛髮傍岸有亭曰漸入佳
境今亦廢唯四大字勒崖石間淳熙中郡守張商卿等題名
尚存泂溪而上過薛老禰入醉翁亭亭又廢名人石刻頗夥
兵後焚煉爲堊殆盡亭後四賢堂亦廢亭側有玻璃泉又名
六一泉石闌覆之闌下壓以巨石中䟽一竅通泉徑可五六
寸手掬飲之溫是日天陰雪花翩翩飄伯清亟倡曰雪作矣
不還將何爲濂遊興方濃掉頭去弗顧其步若飛歷石徑一
里所至回馬嶺伯友追而至伯清繼之伯友曰二客足力弱
不能從矣二客伯賢伯恭也其謂回馬者建炎寇充斥郡